

**Regional News Unit AIR Aizawl**

**Monday, July 22, 2024**

**Time - 7:30 -7:40Hrs**

## **REGIONAL NEWS BULLETIN**

### **HEADLINES (MORNING)**

- Gauhati High Court chuan Mizoram kaltlanga dan kalha kuhva ro sumdawnna chungchang chhui hna chu CBI kutah a dah.
- Tunlai hian Champhai district chhim lam khaw 10 chuanga pangang puangin lo neitute a timangang hle.
- Vawiin atangin Parliament budget session tan a ni dawn.
- Kumin November thlaa US President inthlan tura chuhtu in umna kalmekah President nilai Joe Biden-a chu a inhnuukdawk

<><><>

### **HC FOR CBI PROBE**

Gauhati High Court chuan Champhai district kal tlanga dan kalha kuhva ro tawlh thin ni a sawi chu chhui turin Central Bureau of Investigation (CBI) a hriattir.

Justice Pu Michael Zothankhuma leh Justice Pi Marly Vankung thutna bench chuan tunhnai kha he thupek hi tichhuakin kuhva ro hmanga sumdawnna chungchang hi chhui turin CBI a hriattir a. Hei hi khawtlang tana thawktu 'Ruatfela Nu' ti a hriat lar, Pi Vanramchhuangi'n Gauhati High Court-a public interest litigation (PIL) a thehluh chungchange thutlukna a siam a ni a. Court chuan Myanmar atanga Champhai district kal tlanga kuhva ro tawlh a nih thu leh ramdang thil a ni chunga e-way bill leh GST certificate hmanga phurh tleng thin ni a puhna chu a ngai thutak a. Tun hnai mai-ah pawh hetianga kuhva ro phurh hi thuneitute'n an man thu a tarlang a. Pi Vanramchhuangin' a PIL-a a hnuh luha a khin hrang hrangte chuan he thil inpuhmawhna hi CBI-in chhui se tih hi an hnial lo vek niin court chuan a tarlang a. A bik takin Mizoram Police-te chuan ramdang atanga dan kalha bungraw lakluh hi chhui hi an hna a nih loh thu an sawi a. Sumdawnna kawnga dan bawhchhiatna thil a nih avangin tan bik nei lovin CBI-in chhui se a tha bera an rin thu an sawi a ni tiin High Court bench chuan a thupekah a tarlang a ni.

Ram dang atanga kuhva ro lakluh leh sumdawnna atana hman chungchang hi Mizorama sawi hlawh ber zing ami a ni a. Mi lian leh thiltithei tak takte an inrawlh ni a puhna a awm avangin Police pawhin hemi thil hi an chhui hreh niin a lang a. Hei bakah hian political party-te an inpuhmawh nasa hle bawk a ni. Court chuan tuna sorkarin phalna pek chawp ngai lova CBI-in chhui tul apiang chhui tura nikum December ni 28-a thuneihna a lo pek tawh tlawhchhanin he thil chhui hna hi CBI kuta hlan ta a nih thu a tarlang tel bawk a ni.

<><><>

## PEST OUTBREAK

Tunlai hian Champhai district chhim lam, East Tuipui assembly bial chhunga khaw engemaw zat a tlangram loneitute chu pangang puangin a timangang hle.

Agriculture and Farmers' Welfare department hotute hnen atanga thu dawn danin pangang puan tanna hi a la rei lo na-in khaw 10 chuangte thlawhhma a suasam mek a. He pangang puang hi kum hmasa lama puang thin vaimim hnah leh kung eichhetu Fall Army Worm kha ni lovin 'hnah khawr pangang' an tih mai, sap tawnga 'leaf folder' an tih chi a ni a. Buh hnalah bei-in buh hnah a khawr a, buh hnah leh a kung a tichhe thei a ni. Agriculture department hotute chuan rannung thahna hlo a theih ang anga sem a nih thu leh a hman dan pawh loneitute zirtir an nih thu an sawi a. Hetih lai hian Vaphai khawtlang hruiatu pakhat chuan Champhai District Agriculture Officer pisa lamin an hman duh khawp rannung thahna hlo pek tur an neih loh thu leh a leina tur sum ruahman an neih loh bawk thu an sawi tih Akashvani Aizawl a hrilh a. An rannung thahna hlo sem thenkhat chu kum 2015 a thi (expire) tawhte a nih thu a sawi. Rannung thahna hlo tha a awm loh avangin kah rem a huphurhawm a, buh hnah an khawr tlat avangin a pangang va kahfuh kha a harsa a ni a ti. Pangang puang hian an buh thar tur NASA taka a tihtlem phah an hlauh thu an sawi bawk a ni.

Khi lai biala leilet neitute chuan buh an phun chhoh mek thu leh pangang puangin a la tihbuai ve loh thu an sawi a. Tlangram loneitute erawhin an buaipui hle thu an sawi. Pangang puanna khuate hi hriat theih chinah Farkawn, Vaphai, Vangchhia leh a chhehvel khaw engemaw zat a ni a. Chawlhkar khat kalta a Champhai DAO an sawn tak chuan a awm lai khan khaw 6-ah a puang a, tunah chuan khaw hrang hranga a darh viau tawh a rin thu a sawi a. Tarlan tak khaw chheh velte hi biak pawh hleih theih an ni lo a ni.

Mizote hi a hnam puma lo neih leh thlawhhma laka eizawng thin an nih avangin tunhma atang tawhin an dam-khaw-chhuahna atana an lo neih kaihhnawih thil chik taka lo zir tawh thinte chuan pangang puang ang chi hi thlawhhma tichhe thei leh tam thlen theitu-ah an pawm a. Nakum a 'Thingtam' lo thleng tur hriattir lawkna-ah an ngai a ni. Mautam leh Thingtam apiangin sazu puangin an buh-leh-bal NASA taka tichhia-in tampui mitthi a thlen tawh thin a. Hetiang chhiatna a lo thlen hma hian pangang, thangnang leh khau puang a awm thin niin an sawi a. Kum 1977 kha Thingtam hnuhnung ber a ni a, khata tanga kum 48-na nakum khian a thleng leh ngei dawna chhut a ni a, hmun tam takah rawthing hi a tam tan chho mek ni a sawi a ni bawk.

<><><>

## AGRICULTURE

Mizoram Sawrkar hnuai a Agriculture & Farmers Welfare Department-in Sawrkar laipui ruahmannu hrang hrang a kalpui zingah kumin July ni 18 thleng khan PM-Kisan hnuai dilna lut loneitu nuai 2 chuang zingah mi nuai 1, sing 1, sang 9 leh 259-te chu dawng thei zingah an tel.

**Agriculture & Farmers Welfare department hotute sawi danin Mizoram district 3-ah Pradhan Mantri Fasal Bima Yojana kalpui tan tura hmalak mek a ni a. Kuthnathawka eizawnga buh leh bal leh thlai tharchhuaku pawl Farmer Producers Organisation (FPO 47 din a nih tawh thu an sawi bawk. District 7-ah palm oil huan siam kuthnathawktu mi 10,843 an awm mek a, kumin tleng hian palm oil rah metric tonne 55,936 hrallh chhuah a nih tawh thu an sawi bawk a ni. Tun hnai a Mizorama rawn zin, Union Minister of State for Agriculture and Farmers Welfare Bhagirath Choudhary hnenah khan Sawrkar laipui hnuai a ruahmanna awmte chak zawk a kalpui a nih theih na'n sum ruahman sa te chak tak a pekchhuah a tul thu an lo hrilh a ni.**

<><><>

#### **EMBARGO**

**Central Young Lai Association (CYLA) chuan kar hmasa tawp lam khan Myanmar a nitin mamawh dang phurhluh khap chu an hlip a, petrol, diesel leh leitha thawn luh erawh chu an la dang zui zel.**

CYLA hian tun hnai a Lawngtlai district magistrate-in man tova petrol leh diesel hrallh bakah Myanmar a thawnluh a khap chu lawmawm an tih thu an sawi a. Hemi hnu hian mipui nitin mamawh bungraw dangte Myanmar ram chhunga thawnluh khapna chu Ningani zan khan a thlah dul ta a ni. Lawngtlai atanga bungraw phurhchhuante hi Hruitezawl leh Zochachhuah panpui an ni a, Hruitezawl atang hian Chhimtuipui lui-ah Lawng hmangin Myanmar ramah phurhluh niin, Zochachhuah thlen hma, Zocha Lei (bridge) bul atangin Lawng hmang bawk in Myanmar ah phurhluh a ni. Lawngtlai District-ah raltlan ni lo, ramdangmi ten bu an khuar loh na'n YLA chuan hma a la chhunzawm zel a, Branch YLA te chuan an huamchhungah inkaihruaina siamin hma an la mek a ni.

<><><>

#### **ASF UPDATE**

**Nimin khan African Swine Fever (ASF) hri kai vawk 142 chu Mizoram district 4-ah an thi leh a, hemi tiam hian kumina ASF avanga vawk thi zat chu 6,791 a tling a.**

Nimina vawk thihna district-te hi Aizawl, Serchhip, Hnahthial leh Lunglei te a ni a. A khaw mala vawk thi tamna ber chu Serchhip district a Khawlailung a ni a, 46 an thi a, Aizawl district-a Sateek khua-ah 39 thi-in a khaw thenbawm Aibawk khua-ah 24 a thi a ni. Nikum tawp lama ASF vawk pulhri leng reh tawha ngaih kha kumin kum bulah leng lehin February ni 9 khan Champhai district-a Leithum khua-ah he vawk pulhri kai hi hmuhchhuah leh a ni a. Tun dinhmunah hian veng leh khaw 183 chu ASF vawk pulhri lennah animal husbandry and veterinary department chuan an puang a ni.

Hetih lai hian nimin vek khan vawk pulhri darh venna atan vawk 153 suat/talh a ni a. Heti hian kumina ASF vawk pulhri len tan leh atanga tun thlenga vawk suat zat chu 12,808 a tling tawh a. Niminah khan Khawlailung khuaah ringawt 59 an tihlum a, Hnahthial khua-ah 39 leh Keitum khua-ah 18 an tihlum bawk a ni.

<><><>

## **PARLIAMENT**

**Vawiin atangin Parliament budget session tan a ni dawn a. Budget tanni ah Union Finance Minister Nirmala Sitharaman-i chuan Economic Survey house ah a pharh ang.**

Nimin khan Sawrkar chuan house pahnihah tluang taka rorel anih theih nan political party tin inhmuhkhawm a ko a. Union Parliamentay Affairs Minister Kiren Rijiju chuan sawrkar chu eng thil pawh sawiho turin a inhawng reng a ti a. Rorel inkhawm tluang taka a kal theihna turin sawrkar lai leh opposition ten mawhphurhna an nei a ti.

Nimin inhmuhkhawmah hian Congress PArty chuan NEET paper leak chunchangte, Railway Security, Agniveer Scheme, Centre leh state inlaichinna leh Manipur leh Jammu and Kashmir-a venhimna dinhmun chungchangte sawiho an phut a. Hei bakah hian ram eibar dinhmun chungchang pawh sawiho an phut tih Congress Party hruaitu Jairam Ramesh chuan social media ah a tarlang a ni..

<><><>

## **PARLIAMENT**

**Vawiin atangin Parliament budget session tan a ni dawn a. Budget tanni ah Union Finance Minister Nirmala Sitharaman-i chuan Economic Survey house ah a pharh ang.**

Nimin khan Sawrkar chuan house pahnihah tluang taka rorel anih theih nan political party tin inhmuhkhawm a ko a. Union Parliamentay Affairs Minister Kiren Rijiju chuan sawrkar chu eng thil pawh sawiho turin a inhawng reng a ti a. Rorel inkhawm tluang taka a kal theihna turin sawrkar lai leh opposition ten mawhphurhna an nei a ti.

Nimin inhmuhkhawmah hian Congress PArty chuan NEET paper leak chunchangte, Railway Security, Agniveer Scheme, Centre leh state inlaichinna leh Manipur leh Jammu and Kashmir-a venhimna dinhmun chungchangte sawiho an phut a. Hei bakah hian ram eibar dinhmun chungchang pawh sawiho an phut tih Congress Party hruaitu Jairam Ramesh chuan social media ah a tarlang a ni..

<><><>

## **PRESIDETN BIDEN**

Kumin November thlaa US President inthlan tura chuhtu in umna kalmekah President nilai Joe Biden-a chu a inhnukdawk. Nizana a social media account a a tarlan danin President Bidena chuan President hna a chelh chu a nuna thil ropui ber a ni a ti a. Democratic Party leh an ram tana tha ber tur chu a ngaih pawimawh anih thu sawiin tuna a term la hman tur awmah hian theihtawp a chhuah tur thu a sawi a ni.

President Biden-a tuna Vice President Kamala Harris chu Presidential nomijnee atan a duh thu sawiin thawhpui tha tak a nei chu lawmawm atih thu a sawi a ni.

Kumin June ni 28-a President hlui leh Republican nominee Donald Trump nen debate an neih hnu atangin President Biden hi candidate atanga inhnukdawk tura nawrna a nasa hle a. Tunah hian a chenna Delaware ah COVID-19 a vei avangin enkawl mek a ni.

<><><>